



Rabu, 26 Oktober 2023
Ogen: Keluaren 15:20



Nabiah



Ibas jaman si genduari teridah enggo melala peminpin diberu, subuk i bas pemerintahen, gereja bage pe organisasi kemasyarakatan. I Taneh Karo kususna, bupati diberu. Ketua DPRD kabupaten Karo e pe diberu. Camat pe piga-piga kalak diberu, kepala desa pe enggo enterem diberu. Adi i bas konteks Gereja, si jadi ketua Klasis ras ketua Runggun enggo melala diberu. Pandita diberu enggo menam setengah asa kerina jumlah Pandita GBKP. Ppertia ras Diaken si diberu pe enggo enterem. Si enda encidahken maka kalak karo lanai alergi nandangi peminpin diberu. Adi ibandingkan ras 30 tahun si lepas, jadi pandita diberu pe ipersoalken.

Rikutken budaya Jahudi pe sekalak diberu labo seri ergana ras sekalak dilaki. Sistim patriakal erbahansa diberu megati kurang iperdiateken subuk i bas pendidikenna, pendahinna, ras erga dirina. Megati ikataken diberu e orang kelas dua. Tuhu, budaya e manusia kepe si ngelakokensa, bahanna bagi sura-surana. Adi i bas Dibata, seri nge ergana dilaki ras diberu. Musa ipilih Tuhan jadi nabi, turangna Meriam jadi nabiah.

Nabiah e sekalak nabi diberu, dahinna bali ras nabi si dilaki, e me ngaloken pesan Tuhan arah pengenehenenna entah arah perjumpanna ras Tuhan dingen mpeseh berita i bas Tuhan nari man bangsana. Sekalak nabiah e jadi pemimpin Rohani i tengah-tengah bangsana. Bage me Nabiah Meriam, minpin kerina diberu-diberu lako rende ras landek alu malu gendang encidahken keriahen ukurna muji Tuhan ras ngataken bujur i bas kemenangen si enggo ialokenna i bas Tuhan nari. Teridah la erndobahen dilaki ras diberu, kerina banci jadi peminpin perpulungen lako rende ras ngataken bujur

👉 Semangat jadi peminpin!